

Syor Pemuda Negeri kunjungi MB dan KM

RENGIT, Sabtu.— Semua Pergerakan Pemuda UMNO Negeri disyor mengadakan kunjungan muhibbah dan perbincangan tertutup dengan Menteri Besar dan Ketua Menteri masing-masing, sekurang-kurangnya sekali setiap dua bulan.

Ketua Pergerakan Pemuda UMNO Malaysia, Datuk Haji Suhaimi Haji Kamaruddin menjelaskan mereka juga digalakkan berbincang perkara semasa dengan ahli-ahli exco negeri.

Menurutnya, pertemuan dan perbincangan seperti itu sangat berfaedah bagi kepentingan rakyat khususnya ahli-ahli Pergerakan Pemuda UMNO.

Datuk Haji Suhaimi berkata demikian di majlis perjumpaan hari raya anjuran Pergerakan Pemuda UMNO Bahagian Batu Pahat, di sini, petang semalam.

Baru-baru ini, katanya para pemimpin Pergerakan Pemuda UMNO Malaysia telah mengadakan kunjungan muhibbah dan perbincangan tertutup dengan Perdana Menteri Datuk Seri Dr. Mahathir Mohamad.

"Kami dapati hasilnya sungguh baik dan sebab itu saya mencadangkan Pergerakan Pemuda UMNO Negeri-negeri mencontohi.

Kita akan

mengadakan pertemuan seumpama itu dengan Perdana Menteri sekurang-kurangnya sekali setiap tiga bulan, tapi di peringkat negeri saya cadangkan sekurang-kurangnya sekali setiap dua bulan," jelasnya.

Mengenai Pergerakan Pemuda UMNO Bahagian, beliau berkata, jika dirasakan perlu bolehlah disusun pertemuan seperti itu samada dengan Pegawai Daerah atau Wakil-wakil Rakyat.